

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XLI No. 3
Pebrero 7, 2010
www.philippinerevolution.net

Editorial

Ihanda ang pumuluyo sa nagahana nga kinagamo sa eleksyon

Sa atubang sang desperasyon nga makakapyot sa poder, nagadaku ang posibilidad nga ang wala-tuo nga mga padihot sang rehimeng US-Arroyo magapadulong sa daku nga kinagamo sa nagahilapit nga eleksyon. Hingalitan sang guban Arroyo ang daku nga kinagamo nga ini agud pada-yon nga mauyatan ang gahum. Subong pa lang dapat ginahanda na ang pumuluyong Pilipino nga maghulag agud mapaslaw ang mga padihot sang nagaharing guban kag mapangibabawan ang kinagamo nga igabunga sang mga ini.

Gusto tani ni Arroyo nga ipwes-to ang tampad niya nga tuta nga si Gilbert Teodoro bilang kabaylo nga pangulo para mas epektibong mapatuman ang iban pa nga mga maniobra nila matapos ang eleksyon. Kon mauyatan nila ang magabulos nga pangulo, ginalauman nga mas mahapos nga maduso ni Arroyo ang padihot nga "Cha-cha" nga magahatag-dalan sa pagpwesto sa iya bilang puno nga ministro sa balayon sang isa ka bag-o nga gubyernong parlamentaryo. Pero lubos ang pagsik-way sang pumuluyo kay Teodoro kag iban pa nga kan-


didato ni Arroyo sa mga nasyunal nga pwesto nga subong lunsay nagakaulihi sa mga sarbey.

Matabo lang ang "pagdaog" ni Teodoro kon himuon ang pagdinaya nga mas malaparan kag baraghal sangsa ginhimo nanday Arroyo sang 2004. Panibag-ong pag-alsa sang banwa ang pat-ud nga igabunga sini.

Ginakakulbaan sang guban ni Arroyo nga indi na sini mapunggan nga magdaog ang kandidato sang oposisyon sa pagkapangulo kag iban pa sa nasyunal nga pusisyon. Gani ginaluto sang nagaharing guban ang eksena nga "no proclamation," kon sa diin mga pwesto sa lokal nga gubyerno kag sa manubo nga panalgan sang Kongreso lang ang maproklamar, kag wala sa mga nasyunal nga pwesto. Sa amo nga

eksena ginapadihot ni Arroyo ang pagka-kongresista sang iya distrito sa Pampanga, ang pagkuha man niya sang pwesto sang House Speaker, kag ang pagpungko niya bilang "pangulong pangtransisyon." Kon pati ini alang-alang nga makuha, mahimo pa nga dayunon nga magdeklarar si Arroyo sang "no-el" o no elections, magpapanaog sang "emergency rule" o hayag nga layi militar, kag padayon nga magpungko bilang "pangulong pangtransisyon."

Para masuportahan ini sang kusog-militar,



Mga tampok sa isyu nga ini...

"No-el," ginakakulbaan
PAHINA 3

Dibisyon-kadaku nga operasyon sg AFP sa ICR
PAHINA 4

Madinalag-on nga lakbayan
PAHINA 6

padayon nga ginahanda ni Arroyo ang mas hugot nga pag-uyat sa reaksyunaryo nga hangaway. Ginpwesto na niya bilang bag-o nga National Defense Secretary ang daan nagalibod sang ideya nga “gubernong transisyon” nga si National Security Adviser Norberto Gonzales. Ginahanda man niya ang pagpwesto sang pinakatampad niyang lider militar nga si Gen. Delfin Bangit sa pinakamataas nga liderato sang reaksyunaryong hangaway.

Pilit man nga nagamaniobra si Arroyo para mas hugot nga mauyatan ang Korte Suprema kag mapwesto bilang pinuno sini ang mahistrado nga pinakatampad sa iya. Para mahimo ini, ginapamilit niya nga siya gihapon ang dapat magpili sang magabulos kay Chief Justice Reynato Puno bisan antes pa ang natalana nga pagretiro sini sa Mayo 17. Ini bisan pa, suno sa layi sang reaksyunaryong guberno, indi pwede magnombrar si Arroyo sang bag-ong pinuno nga mahistrado samtang wala pa nabakante ang pusisyon, o magnombrar sang sin-o man nga upisyal sang guberno duha ka bulan antes ang eleksyon tubtub sa katapusan sang subong nga termino sang pangulo sa Hunyo 30.

Ang kundisyon para sa malaparan nga kinagamo sa maabot nga eleksyon ginalauman nga pagatugahon sang pagpalya sang *election automation* o de-kompyuter nga pag-isip. Subong pa lang madamo na nga patimaan kon pano ini matabo. Sobrang atrasado ang pagmanupaktura kag pagdeliber sang mga makina. Ginapanan-aw nga daku nga problema ang kinagamo sang mga botante sa malaba nga balota. Mas daku pa nga problema ang *clustering* o pagsimpon sang mada-mo nga presinto. Sobrang atrasado ang paghanas sang mga titser nga magadumala sa bag-ong sistema sang botohan. Daku man nga problema sa komunikasyon, lakip na ang wala sang *signal* sa *cellphone* sa madamo nga maligwin nga lugar kag pamahug sang malaparan nga pagbara sini agud sablagan ang transmision sang pag-isip sang mga boto.



Sa ginahimo nga pagtilaw sa *election automation* sa pila ka lugar sini lang, nagtuhaw ang madamo nga kinagamo kag problema nga nagapatimaan sang daku nga kapaslawan sa aktwal nga eleksyon. (Lantawon ang kaangot nga artikulo.) May mga patimaan nga ipasibangud sang nagaharing rehimen sa rebolusyonaryong hublag sa pagpalya sang eleksyon.

Indi lipod sa bilog nga pungsod ang mga padihot sang guban Arroyo kag ang ginasulsol sini nga paglupok sang daku nga kinagamo. Indi gid magpasugot ang pumuluyong Pilipino nga mahulog sa mga padihot kag malamon sang kinagamo.

Kon igapamilit sang nagahari nga guban ang mga padihot sini para magpabilin sa poder, igabunga sini ang labi nga paglapad kag pagsingki sang pagbato sang pumuluyo, labi nga banggianay sa kubay sang mga reaksyunaryong sahi kag pagkadto sang rehimen US-Arroyo sa labi nga mabug-at nga pagkapukan. Labi pa sini nga pala-lan ang pangpulitika nga krisis sang nagaharing sistema. Pagatugahon sini ang bag-o nga pangpulitika nga kundisyon nga labing paborable para sa rebolusyon.

Sa atubang sini, dapat labi nga tinguhaon sang mga rebolusyonaryo kag progresibong pwersa ang paghanda sa pumuluyo para hugot nga bantayan kag desaysibo nga batuan kag paslawon ang malaut nga mga padihot sang guban Arroyo. Dapat maabtik nga preparahan ang pag-atubang sa paglupok sang daku nga kinagamo agud mauyatan ini kag matigayon ang kahigayunan agud mapukan ang rehimen Arro-



Tuig XLI No. 3 Pebrero 7, 2010

Ang *Ang Bayan* ginabantala sa leng-gwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

- | | |
|------------------------|---|
| Ihanda ang pumuluyo | 1 |
| “No-el,” ginakakulbaan | 3 |

Madinalag-on nga opensiba

- | | |
|-----------------------------------|----|
| Operasyon sg AFP sa ICR, napaslaw | 4 |
| 10 armas, naagaw | 5 |
| Lakbayan sg mga mangunguma | 6 |
| Importansya sg FQS | 7 |
| Ka Douglas, nagtaliwan na | 8 |
| Hunger strike sa Negros | 9 |
| Presyo sg kalamay, ginapataasan | 9 |
| Pagpahalin sa Japan | 10 |
| Walk-out sg mga estudyante | 10 |

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

yo, isulong ang gahum sang pumuluyo kag labi pa nga pata-ason ang lebel sang ila pagbato.

Epektibong hingalitan sang mga progresibo kag demokrati-kong pwersa ang mga kahigayunan nga masulong ang interes sang pumuluyo sa pag-entra sa parlamentaryong paghimakas kag mga reaksyunaryong eleksyon. Sa amo man, dapat padayon nga igahayag ang esensya sang mga reaksyunaryong eleksyon bilang kabahin sang garuk nga reaksyunaryong sistema pangpulitika, ang mga limitasyon sa pag-entra kag ang wala sang paglaum diri. Ang nagahana nga kapaslawan sang maabot nga eleksyon kag kinagamo nga igabunga sini magserbi nga daku nga leksyon sa kagarukan sang reaksyunaryong pulitika kag eleksyon.

Permi naton nga hatagan tumok ang todo-todo nga pagpukaw, pag-organisa kag pagpahulag sa pumuluyo sa kada adlaw kag ang pagpabaskog sang direkta nga mga pangmasang paghimakas sa mga kalsada, pabrika, uma, eskwelahan, komunidad, kag sa diin man nagatilipon ang pumuluyo. Dapat preparahan man ang madasig nga paghingalit sang mga rebolusyonaryo kag demokratikong pwersa sa mga nagatipon nga kahigayunan para sa ululupod nga direktang paghulag sang pumuluyo padulong sa paglunsar sang gahum sang pumuluyo san-o man kag sa diin man may kahigayunan.

Kadungan sini, dapat labi nga papagsikon ang rebolusyonaryo nga armadong paghimakas. Dapat labi nga pabaskugon ang Bag-ong Hangaway sang Banwa kag pasanyugon ang mga taktikal nga opensiba sini agud mahingalitan ang kinagamo sang reaksyunaryo nga nagaharing sistema kag lubos nga maisulong ang inaway banwa padulong sa mas mataas nga halintang. **AB**

"No-el," ginakakulbaan

Nagapanawagan ang isa ka grupong nagasulong sang "pagbag-o sa pulitika" sa Pilipinas nga hugot bantayan indi lang ang mga dinaya sa eleksyon kundi ang ginakakulbaan nga mga padihot kag peligro nga mapaslawan ang eleksyon sa Mayo. Suno sa Pagbabago!, nagadaku ang posibilidad nga matabo ang senaryong "no-el" o "no elections" kag ang paghatag-dalan sini sa pagluntad sang layi militar sa pungsod.

Nagdaku ang pangulba nga ini sang pila ka beses nga nagpalya ang *field testing* sang mga makina para sa *precinct count optical scanner* (PCOS) nga amo ang pagagamiton sang Commission on Elections (COMELEC) sa labing una nga *election automation* sa pungsod. Suno kay Renato Reyes, *secretary general* sang Bagong Alyansang Makabayan (BAYAN), bal-anon nga kulang ang kahandaan sang mga tinawo sang COMELEC kag Smartmatic-TIM (ang kumpanya nga ginkontra-ta para sa *election automation*) nga masabat ang problema nga pwede magtuhaw sa proseso sang *election automation*.

Suno sa kontrata sa tunga sang COMELEC kag Smartmatic, dapat makumpleto ang mga pagtilaw sang maabot sa 82,000 PCOS antes matapos ang Pebrero. Sa subong, 72 pa lang ang natilawan kag madamo diri ang may mga depekto sa pagbasa sang balota kag transmisyon sang mga resulta sini. Ang pinakaulihi nga mga pagtilaw ginhi-mo sa Pateros kag Taguig sa Metro Manila kag sa South Cotabato.

Bunga sang nagatuluhaw nga depekto sa mga makina kag sistema para sa *election automation*, nanawagan si Rep. Satur Ocampo sang Bayan Muna nga dapat mangin handa ang pumuluyo sa posible nga pagkapaslaw sang eleksyon. Ginatum-ukan ni Ocampo nga dapat pangapinan sang pumuluyo ang ila mga boto kag kinamatarung. Siling niya, madayon man o indi ang *election automation*, malahon nga mangin mabinantayon

ang pumuluyo batuk sa mga maniobra pareho sang natabo sang eleksyon 2004 kon sa diin "nagdagog" si Arroyo paagi sa malaparan nga dinaya. Sang Enero 25 pa nanawagan man ang Catholic Bishops' Conference of the Philippines sa pumuluyo nga mangin mabinantayon batuk sa padihot nga "no-el."

Nadugangan pa ang pangulba nga mapaslawan ang eleksyon sang ihayag mismo sang COMELEC nga nakasulod na sa pungsod ang 5,000 makinang *jammer*. Masarangan sang mga *jammer* nga sablagan kag atrasaron ang *signal* sang mga *cellphone* nga amo ang paagi sang pagpadala sang mga resulta sang botohan sa mga upisina sang COMELEC. Ang pagkaatras sa pagpadala sang resulta mahimo hingalitan para sa operasyong "dagdagbawas," suno mismo sa COMELEC.

Suno naman kay Fidel Agcaoili, tagapangulo sang Human Rights Committee sang Negotiating Peace Panel sang National Democratic Front of the Philippines, ginalatag sang rehimeng US-Arroyo paagi kay National Security Adviser kag National Defense Secretary Norberto Gonzales ang dalan para sa padayon nga pagginahum ni Arroyo. Siling ni Agcaoili, magahimo ang mga pwersa sang AFP kag PNP sang mga paglapas sa tawhanong kinamatarung tubtub sa eleksyon sa Mayo kag ipasibangud ini sa rebolusyonaryong hublag para maghimo sang kinagamo kag magamit ini sa pagpaluntad sang layi militar sa pungsod. **AB**



Dibisyon-kadaku nga operasyon sang AFP sa ICR, ginapaslaw sang BHB

Madinalag-on nga ginapaslaw sang Bag-ong Hangaway sang Banaue sa Ilocos-Cordillera Region ang dibisyon-kadaku nga operasyon militar sang AFP nga ginalunsar sini bilang kabahin sang paghanda sa US-RP Balikatan Exercises nga pagahiwaton sa mga prubinsya sang Ilocos Sur, Mountain Province kag Abra subong nga Pebrero.

Ang opensiba sang kaaway kabahin man sang “end-game” o ulihing hugnat sang pag-atake sang AFP samtang ginapilit sini nga ginalagas ang binuang sini nga handum nga dugmukon o himuon nga inutil ang rebolusyonaryong hublag sa paghingapos sang subong nga termino sang nagaharing rehimen sa Hunyo 2010. Pero sa baylo nga mangin pamatay nga bunal sa BHB sa rehiyon ang malaparan nga operasyon militar nga ini, ang AFP amo ang nagadugo bunga sang sunud-sunod nga mga bira sa ila sang mga Pulang hangaway.

Suno sa pinakaulihing mga report halin sa patag-awayan, indi magnubo sa 65 na ang nangin kaswalti sang kaaway halin sang suguran sang 5th Infantry Division sang AFP ang malaparan nga pagpang-atake sini sa rehiyon sining ulihi nga simana sang Enero. Napulo’g siyam na ang mga suldado nga nagkalamatay kag 36 na ang nagkalapilasan samtang isa ka Pulang hangaway ang naghalad sang iya kabuhi.

Tuso nga ginatago subong sang AFP sa midya ang mga detalye sang malaparan sini nga operasyon militar sa rehiyon para malikawan man nga mabuyag ang kadakuon na sang

mga kaswalti sini.

Masunod ang pinakaulihi nga lista sang mga inaway:

Sa Kalinga. Tatlo ka tropa sang AFP ang napatay kag duha ang napilasan sang ambuson sang mga gerilya halin sa Lejo Cawilan Command sang BHB ang isa ka yunit sang 21st IB sa Mabaca, Balbalan. Duha ka M16 kag ginatos nga bala ang naagaw sang BHB halin sa taktical nga opensiba nga ini.

Sa Abra. Baynte ka tropa sang kaaway ang napatay kag 30 ang napilasan sa serye sang mga pagpang-ambus sang mga yunit sang Agustin Begnalen Command (ABC) sa 41st kag 50th IB.

Sining Pebrero 2, siyam tropa sang 41st IB ang napatay kag 11 ang napilasan sang lambatan sila sang isa ka yunit sang ABC sa Baryo Lat-ey, Malibcong.

Antes ini, 5 suldado ang napatay kag 9 iban pa ang napilasan sang ambuson sila sang mga Pulang hangaway sang ABC sa Kili, Tubo sining Pebrero 1.


Alas-9 sang aga sang Enero 31, isa ka suldado ang napatay kag duha ang napilasan sang ambuson sang ABC ang mga nagapang-ambus sang mga yunit sang 50th IB sa Kili, Tubo.

Alas-4 sang hapon, mga tropa naman sang 41st IB ang ginlambatan sang ABC sa dulunan sang Baryo Lat-ey kag Baryo Matarangan sa Malibcong kon sa diin napatay ang lima ka suldado kag napilasan ang walo pa ka tropa.

Sa Mountain Province. Anum ka elemento sang 54th IB ang napatay kag apat ang napilasan sang lambatan sang isa ka yunit sang Leonardo Pacsi Command sang BHB ang isa ka platoon sang nasambit nga yunit militar sa Mt. Bato, Mainit, Bontoc sang Enero 27. Sa bulig sang masa, madinalag-on nga napiang sang BHB ang “pili nga platoon” nga ginapamunuan ni 1Lt. Victor Leopoldo. Isa ka M16, isa ka teleskopyo kag iban pang kagamitan militar ang naagaw sang BHB.

Daw idu-buang nga nagbalos ang AFP sang 11 ka beses nga ginbombahan sang mga eroplano nga militar kag kanyunon sang AFP ang mga komunidad sa palibot kag waskon ang mga lokal nga sistemang irigasyon, ginakuhaan sang ilimnan nga tubig kag mga palayan sa sulod sang tatlo ka adlaw.

Siling sang Chadli Molintas Command sang BHB sa Ilocos-Cordillera, pat-ud nga mapaslawan ang mga yunit sang AFP nga nagalighot sa mga katalunan, nagapang-ambus sa mga baryo kag nagapang-ambus sa mga ginadudahan nga kampo sang BHB bangud ang mga paglapas sang tawhanong kinamatarung, pagkagguba sang mga pananom, propyedad kag pagkamatay sang mga ginabunga sini ang labing nagadabuk sa kaakig sang pumuluyo. Indi sini mahalitan ang BHB nga pleksible nagagamit sang mga taktikang gerilya para agawon ang inisyatiba kag idikta ang bwelo sang inaway kag madula nga daw bukal sa panan-awan sang kaaway. **AB**





10 armas, naagaw sa mga opensiba

Siyam ka elemento sang kaaway ang napatay kag 16 ang napilasan sa serye sang mga taktikal nga opensiba sang Bag-ong Hangaway sang Banwa (BHB) sa Southern Tagalog, Bicol kag Southern Mindanao halin Enero 14 tubtub Pebrero 4. Napulo ka armas man ang naagum sang mga Pulang hangaway sa mga inaway nga ini.

Sa Southern Tagalog. Ginsalakay sang isa ka platun sang BHB sa Palawan ang detatsment sang Philippine National Police (PNP) sa banwa sang Dumarang sang aga sang Pebrero 4. Nasorpresa ang lima ka pulis nga nagaestar sa Barangay Sta. Teresita sa Dumandan, Palawan sang isa-isa sila nga ares-tuhon sang mga gerilya sang BHB kag himuon nga mga giya sa pag-salakay sa detatsment sang PNP sang aga nga ina. Indi magnubo sa lima ka armas ang nakumpiska sang BHB nga ginalakipan sang isa ka M16, duha ka .45 kag duha ka 9 mm. Naglawig sang 20 minutos sa detatsment ang mga Pulang hangaway. Wala sang napilasan sa mga pulis kag hilway nga nakaatras ang mga Pulang hangaway.

Sa Bicol. Isa ka elemento sang CAFGU ang napatay kag isa ka sul-

dado kag isa pa ka elemento sang CAFGU ang napilasan sang ambu-son sila sang BHB samtang sakay sa isa ka motorsiklo sa Barangay Banuang Gurang, Donsol, Sorsogon sang Enero 29.

Antes ini, naagaw sang Enero 27 sang mga katapo sang Jose Rap-sing Command sang BHB halin sa isa nga ginsilutan nga espiya sang militar ang lima ka armas nga ginagamit sini sa mga kriminal nga hi-likuton sa Barangay Tigbao, Aroroy, Masbate. Nakumpiska halin sa espiya ang isa ka .45, isa ka Ingram *machine pistol*, duha .38, isa ka *shotgun* kag mga bala.

Ginwasak man sang eksplosibo ang dingding sang isa ka *guard ho-use* sang 9th ID kag sang PNP-RMG sa Barangay Armenia, Unson, Masbate sang palukpan ini sang mga gerilya sang banwa sang Enero 20.

Sang Enero 15, duha ka soldado sang 49th IB ang napatay sang pa-ulanang sang bala ang ginasakyan nila nga trak sang militar sa Bara-ngay Palogtok, Irosin, Sorsogon. Sang adlaw man nga ina, apat ka soldado sa idalom sang 9th ID ang napatay kag anom pa ang napila-san sang ambuson ang ila salakyan sa Barangay Lalaguna, Mobo, Mas-bate.

Isa ka soldado ang napatay sang ambuson sang BHB ang isa ka Reengineered Special Operations Team (RSOT) sang 2nd IB sa Bara-ngay Taplacon, Camalig, Albay sad-tong Enero 14.

Sa Southern Mindanao. Pito ka elemento sang 57th IB, lakip ang isa ka upisyal ang napilasan sang palukpan ang ginasakyan ni-la nga trak nga KM450 sang *com-mand-detonated explosives* (CDX) sa Barangay Old Bulatukan, Maki-lala, North Cotabato sang Enero 26.

Sang Enero 21 naman nararong ang isa ka paramilitar nga CAFGU sa idalom sang 72nd IB sang am-buson ang iya yunit sa Barangay Coronon, Sta. Cruz, Davao del Sur sang mga katapo sang Prenteng Gerilya 51 sang BHB. **AB**

Mga pulis sa Bacolod, ginpasakaan sang kasong kriminal

Ginpasakaan sang kasong kriminal ang mga tinawo sang Negros Occi-dental Provincial Office Civil Disturbance Management Team (CDM-PNP 6) bangud sa mapintas nga pagbungkag sa mga pamatan-on nga ak-tibista nga nagalunsar sang aksyon protesta samtang gina-inagurahan ni Gloria Arroyo ang *call center* nga Teleperformance Global Marketing and Teleservices Solutions sa Magsaysay Street, Bacolod City sang Pebrero 3.

Isa si Heinrich Pacheco, Kaba-taan Partylist *coordinator* sa Ne-gros, sa nag-angkon sang mga pilas sa likod, paa kag kamot sang sum-bagon kag hanuton sang mga batu-

ta sang mga pulis sa atubang sang San Antonio Abad Parish Church. Mabaskog nga ginkundenar sang Kabataan Partylist ang brutalidad sang mga pulis.

Pagkatapos inagurahan ang *call center*, naghiwat si Arroyo sang *press conference* nga ginkaughtan sang mga myembro sang midya ba-ngud may paabot sa ila nga indi na sila magpamangkot sang bisan ano maluwas sa mga topiko bahin sa *information technology*. Nag-walk-out si Arroyo sang pamangkuton si-ya kon ngaa manubo ang ginakuha nga grado sa mga sarbey sang gi-namanok niya nga si Gilbert Teodo-ro. Nagbalik siya pero wala man gi-hapon niya ginsabat ang pamang-kot. **AB**

Madinalag-on nga lakbayan sang mga mangunguma

Madinalag-on nga natapos sa makasaysayan nga Taytay sang Mendiola, Maynila sang gab-i sang Enero 22 ang 10-adlaw nga pungsodnon nga martsa sang mga mangunguma. Ginduso sang may 10,000 katapo sang Kilusang Magbubukid ng Pilipinas (KMP), Pambansang Lakas ng Mamamalakaya sa Pilipinas (PAMALAKAYA), partido nga Anakpawis kag mga kaalyado nila ang demanda para sa katarungan kag tunay nga reporma sa duta.

Ang ulihing adlaw sang malaba nga martsa nga ini gindungan man sa pagdumdom sang ika-23 anibersaryo sang Masaker sa Mendiola. Sang Enero 22, 1987, 13 mangunguma ang napatay kag masobra 100 ang nararong sang paulanan sang bala sang mga pwersa pangseguridad sang sadto rehimen ni Corazon Cojuangco-Aquino ang linibo nga mga mangunguma nga nagaduso sang tunay nga reporma sa duta. Tubtob subong wala pa nahatagan-katarungan ang mga biktima.

Gindayaw ni Prof. Jose Ma. Sison (Ka Joema), tsirman sang International League of Peoples' Struggles (ILPS) ang makasaysayan nga pungsodnon nga lakbayan. Gintamyaw niya ang mga mangunguma sa aktibo kag militansya nila sa pag-organisa sang martsang nagsakop sang masobra 1,000 kilometro halin sa Davao City sa sur sang Enero 12 kag sa Tarlac City sa norte nga bahin sang pungsod sang Enero 16. Nagtabuanay ang mga nagmartsa sa upisina sang Department of Agrarian Reform (DAR) sa Quezon City sang Enero 21.

Siling niya, dapat lang nga iduso ang reporma sa duta kag libreng ipanagtag ang duta sa mga nagatalauma sang duta. Dapat mapatuman ang reporma sa duta base sa kusog sang kahublagan mangunguma kag sa katuyuan nga maangkon ang pang-ekonomya, pangkatilingban kag pangpulitika nga kahilwayan sang masang

mangunguma. Indi ini dapat isalig lang sa reaksyunaryong Kongreso.

Ginpakamalaut ni Ka Joema ang Comprehensive Agrarian Reform Program Extension with Reforms (CARPER). Siling niya, katuyuan sini nga tapnaon ang paghimakas sang mga mangunguma para sa duta kag ipabilin ang pyudal kag malapyudal nga pagpanghimulos.

Siling sang tagapangulo sang ILPS, dapat ibuyagyag sa pungsodnon kag internasyunal nga sakop ang mga lokal nga paghimakas sang mga mangunguma para sa duta kag ang pinakamatingkad nga kasong agraryo pareho sang sa Hacienda Luisita, Hacienda San Antonio kag Hacienda Sta. Isabel sa Isabela, Hacienda Looc sa Batangas kag sa mga asyenda kag plantasyon sa Negros kag Mindanao.

Gintumod ni Ka Joema nga ang mga kandidato sa pagkapresidente tulad nanday Benigno "Noy" Aquino III kag Gilbert Teodoro pareho nga naghalin sa mga pamilya sang agalon nga mayduta nga may malapad nga kadutaan sa Tarlac, Pangasinan, Isabela, Negros, Caraga kag Palawan.

Suno naman kay Rep. Satur Ocampo sang Bayan Muna, dapat mahibal-an kag akuon ni Noy Aquino

nga napaslawan ang iloy niya nga si anay pangulo Corazon Aquino nga ipatuman ang tunay nga reporma sa duta. Angot sini, bangud nagahan-

dom siya nga mag-presidente sang pungsod dapat niya nga tadlungon ang kapaslawan nga ina.

Ginbalewala sang mga nagmartsa nga mangunguma ang kakapoy, init kag pagkauhaw, siling ni Danilo "Ka Daning" Ramos, *secretary-general* sang KMP, bangud sa mainit nga suporta sang mga pumulyo nga nakahilera sa ginaagyan nga kalsada kag nagahatag sang mga tinapay kag tubig, pareho sang natabo sang mag-agi sila sa Cabuyao, Laguna. Suportado man sila sang mga tawong simbahan.

Maluwas sa isyu sang duta, ginkundenar sang mga mangunguma ang mapintas nga OBL 1 kag 2 sang rehimeng US-Arroyo kag nagpanawagan sa mga kandidato sa pagkapresidente nga untaton na ang ekstrahudisyal nga pagpamatay sa pungsod kag iban pang paglapas sa tawhanong kinamatarung. Siling nila, indi lang nagakinahanglan sang isa ka maayo nga lider ang pungsod kundi isa ka lider nga wala nabulit ang mga kamay sa dugo sang mga mangunguma kag mga kritiko sini.

Sang magtabuanay na ang mga mangunguma sa DAR sang gab-i sang Enero 21, nagaabot sa 8,000 ang mobilisasyon. Nangin gab-i sang mga progresibo kag makibanhahanon nga ambahanon, binalaybay, drama kag diskurso ang gab-i nga ina. Nagdabdab ang linibo nga sulo sa ginhimo nila nga *torch parade*. Pagkaaga, Enero 22, nag-abot pa sa 10,000 ang mga raliyista sang mag-entra na ang iban pang mga pwersa sang KMU, Anakbayan, LFS, GABRIELA, Alliance of Concerned Teachers, BAYAN kag Bayan Muna. Halin sa DAR, nagmartsa sila pakadto sa Mendiola kon sa diin ginsunog nila ang 1,500 litrato ni Gloria Arroyo kag ang 7-tapak nga "backhoe Gloria" bilang simbolo sang grabe nga pagkangil-ad kay Arroyo sang mga mangunguma kag mayorya sang ginapigos kag ginahimuslan nga pumulyo. **AB**



Ang importansya sang First Quarter Storm sang 1970

Ang masunod ginsipi sa pahayag ni Prof. Jose Maria "Ka Joema" Sison, tagapundar nga pangulo sang Kabataang Makabayan (KM) kag Communist Party of the Philippines sa okasyon sang ika-40 anibersaryo sang First Quarter Storm sang Enero 25, 2010.

Kwarenta ka tuig na ang nakalipas pagkatapos ang isa sa pinakamakasaysayan nga pag-alsa sang mga estudyante kag paman-on halin sa kubay sang mga mamumugon, imol sa syudad kag mangunguma sa Pilipinas. Ang "Bagyo sang Unang Kwarto" amo ang "mayor nga halintang sa pag-uswag sang bag-o nga demokratikong rebolusyon sa Pilipinas," siling ni Ka Joema, isa sa mga nagpamuno sini. Suno sa iya, indi nangin posible ang mga naangkon sang pungsodnon-demokratikong kahublagan kon wala ang bagyo nga ini. Diri nagsublak kag nag-uswag ang madamo nga kadre kag aktibistang masa nga nangin binhi kag nagpalambo sa rebolusyonaryong armado kag indi armadong kahublagan sa pungsodnon nga lebel.

Ang Bagyo sang Unang Kwarto sang 1970 ang pinakamataas nga halintang sang legal nga demokratikong kahublagan masa para sa pungsodnong kahilwayan kag demokrasya antes ang suspensyon sang writ of habeas corpus sang 1971 kag deklarasyon sang layi militar sang 1972. Ginbutang sini sa unahan ang patriyotiko kag progresibong demanda sang pumuluyo batuk sa imperyalismong US kag mga lokal nga mapanghimulos nga sahi.

Ginpalanog sini ang mga islogan nga "Makibaka, Huwag Matakot! Digmang banwa ang sagot sa martial law!" Ginpataas ang makig-away nga diwa sang malapad nga masa sang pumuluyo batuk sa tuta sang US nga rehimeng Marcos kag batuk sa pasulit-sulit nga pamahog sang rehimen nga magadeklarar sang layi militar. Ginduso sini ang mga organisadong pwersa sang pungsodnon-demokratikong kahublagan nga pasikaron ang ila pangpulitika kag pang-organisasyong hilikuton sa kubay sang pumuluyo.

Isa ka wala sang katulad nga putuk-putukan ang Bagyo sang Unang Kwarto sang 1970 sa pagpasulong sang rebolusyong pangkultura sa bag-ong demokratikong ti-

po, nga nagakinahanglan sang pungsodnon, syentipiko kag pangmasang kultura sa balayon sang demokratikong rebolusyon sang banwa nga ginapamunuan sang sahing mamumugon. Produkto ini sang dinekada nga hilikuton pangideolohiya kag pangpulitika sang mga bataon nga proletaryong rebolusyonaryo sa kubay sang mga estudyante kag iban pang paman-on kag sa kubay sang obreros.

Labi sini nga gintuga kag gin-

pabaskog ang bag-ong sulog sang mga pagtuon kag hilikuton masa sa kubay sang paman-on sa linya sang bag-ong demokratikong rebolusyon. Naorganisa kag nahimo ang mga eskwelahan sa pungsodnong demokrasya sa tanan nga upisina sang KM, sa mga eskwelahan, mga pabrika, mga komunidad kag sa tanan nga pangpublikong lugar. Natuga kag napasundayag ang mga obra pangkultura sa mga paman-on kag pumuluyo para pataason ang lebel sang rebolusyonaryong kamuklatan kag militansya.

Nagresulta ang Bagyo sang Unang Kwarto sang 1970 sa edukasyon pangpulitika sang daku nga isip sang pumuluyo kag sang ila pagpatapo sa KM kag iban pang mga organisasyong masa. Sa basehan sang nagapadaku nga kahublagan masa, nakatuon kag narekrut ang ginatos kag pagkatapos ang linibo nga aktibistang masa para mangin katapo sang Partido Komunista sang Pilipinas (PKP).

Katuwang sang Bagyo sang Unang Kwarto sang 1970, nangin mas mabaskog nga makinarya ang KM sa pagpauswag sang mga aktibistang masa sa kubay sang mga



estudyante kag intelektwal kag sa kubay sang mga bataon nga mamumugon kag mangunguma sa pungsodnon nga lebel sa pagtukod sang mga rebolusyonaryong unyon sa pagtrabaho kag sa pagpadala sang nakatuon nga pamatan-on kag mamumugon sa kaumhan para mag-alagad sa BHB kag sa mga rural nga komunidad.

Ang Bagyo sang Unang Kwarto sang 1970 naging yabi sa pagpadasig sang pagdaku sang mga legal nga organisasyong masa, sang mga rebolusyonaryong pwersa pareho sang PKP, BHB kag sang naging mayor nga mga katapo sang alyansa nga sang ulihi naging National Democratic Front of the Philippines. Sang ginpapanaog sang rehimeng Marcos ang layi militar kag ang pasistang diktadurya sa pungsod, naging mas labing determinado pa ang mga rebolusyonaryong pwersa kag pumuluyo nga ilunsar ang malawigan nga inaway banwa nga may pungsodnon-demokratikong linya.

Dapat naton saulugon ang daku nga importansya kag ang padayon nga kabilangguan sang istorikong hitabo nga ini. Dapat naton palig-unon liwat ang desisyon nga isulong ang demokratikong rebolusyon sang banwa sa Pilipinas batuk sa imperyalismong US kag mga lokal nga mapanghimulos nga sahing kumprador kag agalon nga mayduta.

Dapat naton pataason ang lebel sang kahublagan sang pagtuon kag ang obra pangkultura santo sa linya sang bag-ong demokratikong rebolusyon. Dapat naton tudluan kag pamuklaton ang pumuluyo paagi sa tanan nga sari sang impormasyon, edukasyon kag maarte nga ekspresyon. Dapat magrekrut kita sang mas madamo pa nga pumuluyo sa mga patriyotiko kag progresibong organisasyong masa labi na ang mga obreros, mangunguma, kababainhan kag pamatan-on. Dapat naton pahulagon ang mas madamo nga isip sang pumuluyo para maghimo sang nagkalainlain nga porma sang paghimakas batuk sa rehimeng US-Arroyo kag bilog nga malakolonyal kag malapyudal nga nagaharing sistema.

Ginaatubang naton subong ang pinakamalala nga krisis sang pangkalibutanon nga sistemang kapitalista halin pa sang dekada 1930 bangud sa polisiya nga “neoliberal” nga globalisasyon nga sulsol sang US kag imperyalistang agresyon kag terorismo. Ang malapad nga masa sang pumuluyo nagabatas sang pagpanghimulos kag pagpamigos nga mas malala sangsa sa nakalipas nga apat ka dekada. Ang indi na maagwanta nga kundisyon nga ini nagatulod sa pumuluyo kag sa mga rebolusyonaryong pwersa nga militante kag lubos kaisog nga magbato para sa ila pungsodnon kag demokratikong kinamatarung kag interes. AB

Ka Douglas, nagtaliwan na

Nagtaliwan na ang Vice President for External Affairs sang Kilusang Mayo Uno (KMU) nga si Douglas Dumanon. Namatay si Ka Douglas sa balatian nga kanser sa tutunlan sang Enero 25 sa edad nga 56.

Nagsugod nga maghulag si Ka Douglas sang First Quarter Storm (FQS) sang 1970. Naging katapo siya sang Kabataang Makabayan (KM) sa Pamantasan ng Lunsod ng Maynila sang siya ara sa kolehiyo. Isa siya sa mga gindakup kag ginkulong sang layi militar. Sang mahilway sang 1970, naging organisador siya sang KM kag naging ikaduha nga sekretaryo sa edukasyon.

Naghulag siya sa kubay sang mga mamumugon kag napilian sang 1977 bilang tagapangulo sang Luzon Stevedoring Corporation (Luzteveco) sa Sta. Mesa, Maynila. Sang matukod ang KMU sang 1980 nanombrar siya nga Tresorero Nasyunal sini. Nanguna siya sa madinalag-on nga welga kag protesta sang Luzteveco sang 1982 kag sa pagkontra sa mga sala nga pamin-saron kag gawi sa kahublagang mamumugon sang dekada 1980 kag 1990. Sang maaresto ang kadam-an sa mga lider sang KMU sang 1982, isa siya sa nag-uyat sang importante nga responsibilidad sa KMU.

Napilian bilang Vice President for Federation Affairs si Ka Douglas sang 2003. Naabot niya ang mapagros nga pag-angtanay kag pagpakigbuligay sang nagkalain-lain nga unyon sa 20 ka pungsod. Gintugyanan man siya nga magsubaybay sa Kalipunan ng Damayang Mahihirap (KADAMAY), isa sa mga myembro nga pederasyon sang KMU. Desaysibo ang iya pagpamuno sa KADAMAY kag imol nga tagasyudad pareho sang pagpamatuk sa National Government Center Housing Project kag Philippine National Railways Modernization and Rehabilitation Program (PNR-MRP). Aktibo man siya sa pagtukod sang nagkalain-lain nga alyansa kag organisasyon sa mga komunidad kag nanguna sa paghulag pareho sang Kalbaryo sang mga Imol kag Martsa sang mga Imol.

Antes siya nalatnan sang malala nga balatian, isa si Ka Douglas sa mga nanguna sa paglunsar sang Ikatlong Pambansang Kongreso sang KADAMAY sang 2008. Naging dalan ini agud mapaayo ang pagpamuno kag operasyon sang KADAMAY sa nasyunal nga sakop.

Sa pagpasidungog nga ginlunsar sang KMU kag KADAMAY sang Enero 30, ginlaragway siya sang iya mga kaupod bilang huwaran nga lider-obrero, aktibong organisador, edukador, proletaryado kag rebolusyonaryo.

Nailo sa pagpanaw ni Ka Douglas ang iya asawa kag anom ka anak. AB

Mga mangunguma sa Negros, naglunsar sang *hunger strike*

Naglunsar sang *hunger strike* ang walo ka mga katapo sang Kilusang Magbubukid ng Pilipinas (KMP) kag National Federation of Sugar Workers (NFSW) sa atubang sang kapitolyo sang Negros Occidental sang Enero 18 tubtub Enero 23.

Demanda nila ang pagpasar sang HB 3050 o Genuine Agrarian Reform Bill (GARB), pagpauntat sa ekstrahudisyal nga pagpamatay kag pagkabig nga kaso kriminal ang mga kaso nga may kaangtanan sa problema nga agraryo, partikular sa pagpanag-iyang mga duta nga sakop sang Comprehensive Agrarian Reform Program (CARP).

Ginaduso man nila ang pagdis-arma kag pagbungkag sa bandidong grupo nga paramilitar nga ginatawag "Revolutionary Proletarian Army" (RPA). Ini, siling nila, ang responsable sa pi-la ka mga ekstra-

hudisyal nga pagpamatay kag pagdukot sa prubinsya pero wala sang tikang ang PNP batuk diri.

Siling ni Isidro Castillo, tagapangulo sang NFSW, ginalunsar nila ang *hunger strike* para mabaskog nga mapaabot ang mensahe nila sa Malacañang kag sa liderato sang gubyerno prubinsyal nga ang mga mangunguma kag mamumugon sa uma sa Negros, ginagutom, wala duta kag ginadingutan sang katarungan.

Nangin epektibo ang ila *hunger strike* bangud pagkatapos sang 5 ka adlaw



nahatagan ang mga mangunguma sang kahigayunan nga mapamatian ang ila mga reklamo kag demanda.

Nalista sang KARAPATAN ang 11 ka kaso sang ekstrahudisyal nga pagpamatay sang mga mangunguma kag mamumugon sa uma sa Negros sang 2009. Samtang, ginbu-yagyag ni Castillo nga ginpasakaan ang mga katapo sang KMP kag NFSW sang mga kasong kriminal kag sibil pareho sang pagpanakaw, *usurpation of real property rights, grave coercion, robbery in band* kag *forcible entry* labi na sa mga duta nga ginpaidalom sa CARP.

Ang pagkriminalisa sang mga kaso nga agraryo sa Negros sang 2009 tubtub sa subong pamatuod nga nagahimbunanay ang mga agalon nga mayduta kag korte para li-wat ikonsentrar ang duta sa mga agalon nga mayduta, siling ni Castillo. Sa sina, siling niya, madulaan sang kinamatarung nga magtalauma ang mga mangunguma kag magapabilin nga manubo ang sweldo sang mga mamumugon sa uma sa mga asyenda. Sa subong, ang mga mamumugon sa uma sa Negros nagabaton lang sang P60 tubtub P100 kada adlaw. AB

Pagtaas presyo sang kalamay

Sunud-sunod nga mga pagkastigo kag hublag protesta ang ginlunsar sang kahublagang mangunguma kag mga progresibong grupo batuk sa gulpe nga pagtimbuok sang presyo sang kalamay. Nagaabot na subong sa P54 asta P60 ang presyo sang kada kilo sang puti nga asukal.

Nagsugod magtimbuok ang presyo sang asukar sang Enero 23 sang naglab-ot ini sa P52 kada kilo halin sa P48 sang Enero 5 kag P45 sang Disyembre 22. Bangud sa bul-to-bulto nga pagtago sang mga mapanghingalit nga negosyante sa suplay sang kalamay kag sa padayon man nga pagpalak sang mga konsumidor nga magbakal sini sang madamuan, nagtaas man ang presyo sang tinapay. Ang anay P30 kada napulo ka pandesal P31 na su-

bong kag ang daan nga P50 nga *loaf bread* P55.50 na.

Ginapalapnag sang rehimeng Arroyo nga ang rason sang pagtaas sang presyo sang asukal amo ang pagtaas sang presyo sini sa pangkalibutanon nga merkado bangud sa kakulangan sang suplay. Ang matuod nga sobra-sobra na ang suplay sang lokal nga kalamay halin pa sang 2003 kag nag-eksport pa gani sini ang Pilipinas. Tiempo man sang paggaling sang tubo ang

Enero asta Marso gani makatilinga-la nga mawad-an sang bastanteng suplay ang lokal nga merkado.

Ginagamit sang rehimen ang pagtaas sang presyo sang asukal sa pangkalibutanong merkado kag ang kawad-on kuno sini para iduso ang pagbakal sini sa guwa kag makapanginpulos ang mga kahimbon sini nga daku nga komersyante. Pamaagi man ini para makakupit sang daku ang rehimen sa pondo nga pagagamiton sa pag-import, pareho sang nahimo sang nagaharing guban sa pag-import sang bugas. Gilayon nga ginmandu ni Arroyo ang pag-angkat sang 15,000 metriko toneladas nga asukal kag pagtigana sang P2 bilyon para diri. AB

Malaparan nga pagpahalin sa Japan, US kag UK

Masobra 15,700 obreros sang Japan Airlines Corporation (JAL) ang ginsipa sang Enero bangud sa pagkaputo sang kumpanya. May \$25 bilyon nga utang ang JAL, ginatublag sang problema sang nagataas nga presyo sang gasolina kag paghina sang isip sang mga pasahero. Ang JAL, pinakadaku nga *airline* sa Asia, padayon lang nga makaopereyt bangud sa masobra 1 trilyon yen (\$11 bilyon) nga suporta sang gubyrno. Kabaylo sini, pagadumalahan man sang gubyrno ang kumpanya. Tatlong beses nga ginsalbar sang gubyrno ang JAL sining nakaligad nga 10 ka tuig.

Ang pagpangutang sang JAL ikaapat nga pinakadaku sa kasaysayan sang pungsod. Bangud sa pagkaputo, naghubo sang 90% ang balor sang sapi sang JAL kag pagakuhaon na ini sa merkado sang mga sapi sa Pebrero 20. Sa sobra kanubo sang balor sang mga sapi sini sa merkado (\$150 milyon na lang), mas gamay pa sangsa balor sang isa ka eroplanong Boeing 747. Gani, pagadulaon na ang masobra 24 nga wala nagakita nga ruta.

Sa US. Nalista nga 196,000 obreros ang nadulaan sang trabaho, suno sa isa ka report nga ginpagguwa sang Disyembre 2009. Pamatuod ini nga wala pa nakabawi ang ekonomya sang US sa grabeng resesyon sa pihak sang mga pahayag sang rehimeng Obama nga nagaayo na ang ekonomya. Ang tantos sang wala trabaho 10%, pinakamataas halin sang dekada 1980.

Umpisa sang magsugod ang resesyon 7 milyong obreros na ang nadulaan sang trabaho. Sa sektor nga nagamanupaktura sang mga produktong pangkonsumo, 81,000 mamumugon; 27,000 sa sektor sang manupaktura; 53,000 sa konstruksyon; 4,000 sa sektor pangserbisyo; 10,000 sa *retail*; kag 21,000 empleyado sang gubyrno ang nadulaan sang mga trabaho. Bangud wala sang masudlan nga trabaho, masobra 661,000 tawo ang nagpundo sa pagpangिता sang trabaho.

Sa United Kingdom. Gin-anunsyo sining Enero sang GlaxoSmithKline, isa ka higitang kumpanya nga nagahimo sang bulong sa UK nga dugang 4,000 sini ka obreros ang madulaan sang trabaho sa US kag Europe. Ang kakumpetensiya nga kumpanya sini, ang AstraZeneca, ang magabuhin man sang dugang nga 8,000 mamumugon sa bilog nga kalibutan para makabuhin sang gastos. AB

Mga estudyante sa UP kag FEU, nag-walk out

Naglunsar sang aksyon-protesta ang mga estudyante sang University of the Philippines-Los Baños sang Enero 29 para pamatukan ang polisiya sang administrasyon nga padakuon ang isip sang mga tumuluon sa isa ka klasrum.


Sa ginatawag “large class policy,” pahanugutan na sang UP nga mag-abot sa 120-175 ang mga tumuluon halin sa daan nga 25-40 lang sa isa ka klasrum. Suno sa UP, ini para makakuha kuno sang madamo pa nga tumuluon nga gusto magkolehiyo. Apang suno sa Youth League for the Advancement of Democratic Rights (Youth Lead), ang amo nga polisiya magapalala sang kahimtangan sang edukasyon sa UP. Pagamayon sini ang ihibalo kag partisipasyon sang mga tumuluon sa mga talakayan sa klase. Dugang pa, mabuhinan man ang oras sang pagtudlo sang mga titser nga mahimo magresulta sa malaparan nga pagpahalin. Dapat, siling nila, magtigana sang daku nga badyet sa edukasyon kag pataason sang unibersidad ang kalidad sang pagtudlo sa baylo nga magpatuman sang mga anti-estudyante, anti-manunudlo kag anti-akademiko nga polisiya.

Masobra 1,000 estudyante kag titser ang nag-walk out halin alas-7 sang aga asta alas-12 sang udto. Isa ka manipesto man ang ila ginhatag sa UP Board of Regents nga nagasaad sang ila pagpamatuk sa nasambit nga polisiya kag nagdemanda nga ibasura ini. Antes ini, naglunsar man sila sang isa ka simana nga *silent protest* kag *black shirt day* nga protesta.

Samtang, nag-walk out man sa ila nga mga klase ang mga estudyante kag titser sang Far Eastern University (FEU) sa Maynila sang Enero 20. Ang paghulag ginlunsar para pamatukan ang pagpamigos sa kampus, lakip ang pagpang-ipit sa pangulo sang unyon sang mga manunudlo nga si Joey Ting. Aktibo ang unyon nga nagapakig-away para sa Collective Bargaining Agreement (CBA) para sa ila dugang nga sweldo.

Nagpiket man ang mga tumuluon sang UP-Diliman sa atubang sang Commission on Higher Education (CHED) sang Pebrero 5 para ireklamo ang padayon nga pagpatuman sang “no permit, no exam policy” sang mga tag-iya sang eskwelahan, bisan nagpagwa na sang *memo* batuk diri ang CHED.

Antes ini, ginpasaka sa Kongreso ni Rep. Raymond Palatino sang Kabataan Partylist ang HB 6799. Katuyuan sang hagna nga layi nga silutan ang mga tag-iya sang eskwelahan nga nagapatuman sang “no permit, no exam policy.” AB

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Tuig XLI No. 3
Pebrero 7, 2010
www.philippinerevolution.net

Editorial

Ihanda ang pumuluyo sa nagahana nga kinagamo sa eleksyon

Sa atubang sang desperasyon nga makakapyot sa poder, nagadaku ang posibilidad nga ang wala-tuo nga mga padihot sang rehimeng US-Arroyo magapadulong sa daku nga kinagamo sa nagahilapit nga eleksyon. Hingalitan sang guban Arroyo ang daku nga kinagamo nga ini agud pada-yon nga mauyatan ang gahum. Subong pa lang dapat ginahanda na ang pumuluyong Pilipino nga maghulag agud mapaslaw ang mga padihot sang nagaharing guban kag mapangibabawan ang kinagamo nga igabunga sang mga ini.

Gusto tani ni Arroyo nga ipwes-to ang tampad niya nga tuta nga si Gilbert Teodoro bilang kabaylo nga pangulo para mas epektibong mapatuman ang iban pa nga mga maniobra nila matapos ang eleksyon. Kon mauyatan nila ang magabulos nga pangulo, ginalauman nga mas mahapos nga maduso ni Arroyo ang padihot nga "Cha-cha" nga magahatag-dalan sa pagpwesto sa iya bilang puno nga ministro sa balayon sang isa ka bag-o nga gubyernong parlamentaryo. Pero lubos ang pagsik-way sang pumuluyo kay Teodoro kag iban pa nga kan-


didato ni Arroyo sa mga nasyunal nga pwesto nga subong lunsay nagakaulihi sa mga sarbey.

Matabo lang ang "pagdaog" ni Teodoro kon himuon ang pagdinaya nga mas malapa-ran kag baraghal sangsa ginhimo nanday Arroyo sang 2004. Panibag-ong pag-alsa sang banwa ang pat-ud nga igabunga sini.

Ginakakulbaan sang guban ni Arroyo nga indi na sini mapunggan nga magdaog ang kandi-dato sang oposisyon sa pagkapangulo kag iban pa sa nasyunal nga pusisyon. Gani ginaluto sang nagaharing guban ang eksena nga "no proclamation," kon sa diin mga pwesto sa lokal nga gubyerno kag sa manubo nga panalgan sang Kongreso lang ang maproklamar, kag wala sa mga nasyunal nga pwesto. Sa amo nga

eksena ginapadihot ni Arroyo ang pagka-kongresista sang iya distrito sa Pampanga, ang pagkuha man niya sang pwesto sang House Speaker, kag ang pagpungko niya bilang "pangulong pangtransi-syon." Kon pati ini alang-alang nga makuha, mahimo pa nga dayunon nga magdeklarar si Arroyo sang "no-el" o no elections, magpapanaog sang "emergency rule" o hayag nga layi militar, kag padayon nga magpungko bilang "pangulong pangtransisyon."

Para masuportahan ini sang kusog-militar,



**Mga tampok
sa isyu nga ini...**

"No-el," ginakakulbaan
PAHINA 3

**Dibisyon-kadaku nga
operasyon sg AFP sa
ICR**
PAHINA 4

**Madinalag-on nga
lakbayan**
PAHINA 6

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com